

SOALAN NO. : 166

**DEWAN RAKYAT MALAYSIA
PERTANYAAN LISAN**

PERTANYAAN : LISAN

**DARIPADA : DATO' DR. NIK MAZIAN BIN NIK MOHAMAD
[PASIR PUTEH]**

TARIKH : KHAMIS, 12 JUN 2014

SOALAN : 166

Dato' Dr. Nik Mazian bin Nik Mohamad [Pasir Puteh] minta **MENTERI SUMBER ASLI DAN ALAM SEKITAR** menyatakan kenapakah Kementerian mengenakan caj yang amat tinggi ke atas lesen menembak ayam hutan dan haiwan yang sejenis dengannya sedangkan pada masa yang sama kegagalan Kementerian untuk menangani pemburu-pemburu haram.

JAWAPAN:

Tuan Yang Dipertua,

Untuk makluman Ahli Yang Berhormat, pihak Kementerian menerusi Jabatan Perlindungan Hidupan Liar dan Taman Negara (PERHILITAN) adalah bertanggungjawab memastikan spesies hidupan liar di negara ini diuruskan secara lestari. Spesies Ayam Hutan (*Gallus gallus*) dan hidupan liar lain sejenisnya adalah hidupan liar disenaraikan di bawah Jadual Pertama, Bahagian 1 Akta Pemuliharaan Hidupan Liar 2010 [Akta 716] dan merupakan spesies buruan. Fi bagi memburu spesies ini adalah tidak mahal iaitu sebanyak RM10.00 sahaja bagi setiap ekor seperti dalam Peraturan-Peraturan Pemuliharaan Hidupan Liar (Fi Lesen, Permit dan Permit Khas) (Pindaan) 2013.

Di bawah Akta 716, sejumlah 2,005 kes perlanggaran akta telah direkodkan sejak ia dikuatkuasakan pada 28 Disember 2010 hingga April 2014. Daripada jumlah keseluruhan kes tersebut, sebanyak 47 kes melibatkan pemburuan haram berjaya dipatahkan. Akta 716 ini juga telah mengenakan hukuman dan denda yang sangat berat sehingga RM500,000.00 dan penjara selama 5 tahun bagi kesalahan-kesalahan memiliki hidupan liar yang dilindungi sepenuhnya tanpa permit khas.

Maklumat tambahan

Penetapan sesuatu fi bagi lesen memburu hidupan liar ditetapkan setelah mengambil kira beberapa faktor-faktor berikut:

- a) taburan dan inventori populasi hidupan liar bagi setiap spesies;
- b) pandangan dan cadangan orang awam, Pertubuhan Bukan Kerajaan (NGO), persatuan peniaga hidupan liar, persatuan komuniti, agensi-agensi kerajaan yang lain dan pihak berkepentingan dalam menjalankan perniagaan dan konservasi hidupan liar;
- c) status konservasi hidupan liar spesies hidupan liar yang berkenaan; dan
- d) keperluan semakan semula fi lesen memburu hidupan liar yang telah digunapakai sejak tahun 1990.

Dalam masa yang sama, pihak Jabatan PERHILITAN akan terus meningkatkan usaha-usaha penguatkuasaan bagi menangani isu pemburuan haram hidupan liar di negara ini. Antara langkah-langkah yang diambil ialah:

- a) Meningkatkan operasi penguatkuasaan mengikut peruntukan perundangan sedia ada dan mengambil tindakan tegas terhadap aktiviti membunuh dan menjerat hidupan liar;

- b) Meningkatkan aktiviti pencegahan pencerobohan dan pemburuan haram di dalam Kawasan Perlindungan seperti di Taman Negara dan rezab-rezab hidupan liar. Pada tahun 2002 hingga Jun 2013, pihak Jabatan telah berjaya menjalankan lebih 900 rondaan penguatkuasaan;
- c) Mewujudkan Unit Jenayah Hidupan Liar atau *Wildlife Crime Unit* (WCU) yang bergerak aktif tanpa sempadan di seluruh Semenanjung Malaysia;
- d) Memperkukuhkan jaringan kerjasama dengan pihak Angkatan Tentera Malaysia (ATM) menerusi Program *1-Malaysia Biodiversity Enforcement Operation Network* (1M-BEON);

Selain itu peranan orang ramai dan NGO dalam memberikan maklumat terhadap aktiviti pelanggaran Akta 716 juga sangat menggalakkan. Seringkali pihak Jabatan PERHILITAN menerima maklumat berkenaan pemburuan haram hasil daripada program-program kesedaran yang dijalankan oleh pihak jabatan.

Di bawah Akta 716, sejumlah 2,005 kes pelanggaran akta telah direkodkan sejak ia dikuatkuasakan pada 28 Disember 2010 hingga April 2014. Daripada jumlah keseluruhan kes tersebut, sebanyak 47 kes melibatkan pemburuan haram berjaya dipatahkan. Akta 716 ini juga telah mengenakan hukuman dan denda yang sangat berat sehingga RM500,000.00 dan penjara selama 5 tahun.

MAKLUMAT TAMBAHAN

Musim terbuka bagi memburu spesies ini adalah pada 1 Mei hingga 31 Ogos setiap tahun. Bagi spesies-spesies lain yang sejenis dengan Ayam hutan, fi lesen memburu adalah seperti di Jadual 1.

JADUAL 1: SENARAI SPESIES BURUNG BURUAN DAN FI YANG DITETAPKAN

Bil.	Spesies	Fi (RM)	
		Akta 76	Akta 716
1	Punai Tanah (<i>Chalcophaps indica</i>)	RM50.00 / lesen (tanpa had)	RM50.00 / ekor
2	Punai Daun (<i>Treron olax</i>)	RM50.00 / lesen (tanpa had)	RM50.00 / ekor
3	Punai Gading (<i>Treron vernans</i>)	RM50.00 / lesen (tanpa had)	RM50.00 / ekor
4	Pikau (<i>Coturnix chinensis</i>)	RM50.00 / lesen (tanpa had)	RM50.00 / ekor
5	Ayam Hutan (<i>Gallus gallus</i>)	RM50.00 / lesen (tanpa had)	RM10.00 / ekor
6	Ruak-ruak (<i>Amaurornis phoenicurus</i>)	RM50.00 / lesen (tanpa had)	RM10.00 / ekor
7	Sintar Dahi Putih (<i>Porzana cinerea</i>)	-	RM50.00 / ekor
8	Tiong Mas (<i>Gracula religiosa</i>)	RM5.00 /ekor	RM10.00 / ekor
9	Murai Batu (<i>Copsychus</i>	RM25.00 / ekor	RM20.00 / ekor

	<i>malabaricus</i>)		
10	Mata Putih Timur, Kelicap Kunyit (<i>Zosterops palpebrosus</i>)	RM25.00 / ekor	RM10.00 / ekor
11	Ciak Tempua (<i>Ploceus philippinus</i>)	-	RM50.00 / ekor
12	Bayan Serindit (<i>Loriculus galgulus</i>)	RM5.00 /ekor	RM10.00 / ekor

